

Evening Dogri (NSD) Bulletin 14-06-2024

आकाशवाणी

खास खबरां ...

- 1 प्रधानमंत्री नरेन्द्र मोदी होर अज्ज ईटली दी अपूलिया थाहर जी-7 आउटरीच शिखर सम्मेलन च भाषण देंगन।
- 2 प्रधानमंत्री नरेन्द्र मोदी होर ईटली च जी-7 शिखर सम्मेलन थमां बक्खरे केई विश्व लीडरें कन्नै दबक्खी बैठकां लाइयां।
- 3 गृहमंत्री अमित शाह होरें अज्ज नमीं दिल्ली च गृहमंत्रालय दे वरिष्ठ ऐहलकारें कन्नै बैठक दरान जम्मू कश्मीर च सुरक्षा स्थिति बारे जायजा लैता।
- 4 शिक्षामंत्री धर्मेन्द्र प्रधान होरें आखेआ जे सरकार नीट दे परीक्षार्थिणं दे हितें दी राक्खी लेई वचनबद्ध ऐ।
- 5 कुवैत च होए दी अग्ग लगने आली घटना च मारे गेदे भारतीय नागरिकें दी अस्तिएं गी लेइयै भारतीय वायु सेना दा विशेष जहाज अज्ज बडलै केरल दे कोची हवाई अड्डे पुज्जा।
- 6 दौ दिनी भारत-आईओआरए क्रयूज सैलसफा शिखर सम्मेलन अज्ज नमीं दिल्ली च सम्पन्न।

<><><><><><>

PM G7 Meet

प्रधानमंत्री नरेन्द्र होर जी-7 आउटरीच शिखर सम्मेलन च हिस्सा लैने आस्तै ईटली गेदे न। ओह जी-7 आउटरीच शिखर सम्मेलन च हिस्सा लैने लेई ईटली दी प्रधानमंत्री जार्जिया मेलोनी हुंदे साददे पर गेदे न। शिखर सम्मेलन दे बाहरें उनें केई सारियां दबक्खी बैठकां लाइयां ते विश्व नेताएं कन्नै मलाटी कीती।

प्रधानमंत्री दे तौर पर त्रिए बारी औहदा सांभने मगरा एह उंदा पैहला विदेशी दौरा ऐ। रवाना होने थमां पैहले मोदी होरें आखेआ हा जे सरकार भारत-ईटली रणनीतिक सांझेदारी गी तगड़ा करने ते भारत-प्रशांत क्षेत्र च सैहयोग गी बढ़ावा देने लेई वचनबद्ध ऐ। उनें आखेआ हा जे शिखर सम्मेलन दरान मुख करी ध्यान आर्टिफिशल इंटैलीजेंस, ऊजा, अफ्रीका पर दित्ता जाग। जी-7 च कनाडा, फ्रांस, जर्मनी, ईटली, जापान, बरतानिया ते अमरीका शामन ऐ।

<><><><><><>

PM-Bilateral

प्रधानमंत्री नरेन्द्र मोदी होर जी-7 शिखर सम्मेलन च हिस्सा लैने लेई ईटली पुज्जे। श्री मोदी होरें केई मुखें दे प्रमुख कन्नै दबक्खी बैठक कीती। मोदी होरें दपैहरी फ्रांस दे राष्ट्रपति इमैनुएल मैक्रों हुंदे कन्नै मलाटी कीती। दौनें नेताएं रक्षा, परमाणु, अंतरिक्ष, शिक्षा, जलवायु क्षेत्र च कारवाई, डिजीटल सार्वजनिक बुनियादी ढांचे, महत्वपूर्ण प्रौद्योगिकीएं, कनेक्टिविटी ते संस्कृतिक दे क्षेत्र च अपनी सांझेदारी गी होर मजबूत करने पर चर्चा कीती। उनें प्रमुख वैश्विक ते क्षेत्रीय मुद्दें पर बी बचार दा आदान-प्रदान कीता। ओह मेक इन इंडिया पर मता ध्यान केन्द्रित करने दे कन्नो कन्नी रणनीतिक रक्षा सैहयोग गी होर तेज करने पर सैहमत होए। दौनें नेताएं अगले साल फ्रांस च आयोजित होने आले औंदे आर्टिफिशल इंटैलीजेंस शिखर सम्मेलन दे सरबंधे च मिलिये कम्म करदे होई आर्टिफिशल इंटैलीजेंस उभरती तकनीकें ऊजा ते खेड्डें दे क्षेत्र च सैहयोग दा विस्तार करने पर बी सैहमति प्रकट कीती। उनें इस गल्ला पर जोर दित्ता जे इक स्थिर ते समृद्ध वैश्विक बवस्था आस्तै भारत ते फ्रांस बशकार इक मजबूत ते भरोसेमंद रणनीतिक सांझेदारी जरूरी ऐ। प्रधानमंत्री मोदी होरें राष्ट्रपति मैक्रों होरें गी औंदे पेरिस ओलंपिक ते पैरालॉंपिक खेड्डें आस्तै अगेत्री शुभकामना दित्ती। प्रधानमंत्री नरेन्द्र मोदी होरें बरतानिया दे अपने हमरूतबा ऋषि सुनक हुंदे कन्नै बी मलाटी कीती। सोशल मीडिया पोस्ट च मोदी होरें आखेआ जे भारत ते बरतानिया बशकार भ्याली गी होर बी मजबूत करने दी अपनी वचनबद्धता दोहराई।

मोदी होरें यूक्रेन दे राष्ट्रपति बालादीमी जलेंस्की हुंदे कन्नै बी मलाटी कीती। दौनें नेता यूक्रेन दी स्थिति पर चर्चा कीती ते दबक्खी रिश्ते पर बी गल्लबात होई।

<><><><><><>

Amit Shah

गृहमंत्री अमित शाह होरें अज्ज नमीं दिल्ली च गृहमंत्रालय दे वरिष्ठ ऐहलकारें कन्नै इक बैठक दरान जम्मू कश्मीर च सुरक्षा स्थिति दा जायजा लैता। श्री शाह होरें जम्मू कश्मीर च सुरक्षा स्थिति दे श्री अमरनाथ यात्रा लेई तैआरिणं दा जायजा लैने लेई 16 जून गी बी इक बैठक करने दा हुक्म दित्ता। इस बैठक च जम्मू कश्मीर दे उपराज्यपाल मनोज सिन्हा, राष्ट्रीय सुरक्षा सलाहकार, केन्द्रीय गृह सचिव, जम्मू कश्मीर थमां फौज ते पुलस दे वरिष्ठ अधिकारी ते गृहमंत्रालय दे वरिष्ठ ऐहलकारें हिस्सा लैता।

<><><><><><>

Pradhan-NEET

शिक्षा मंत्री धर्मेन्द्र प्रधान होरें गलाया ऐ जे केन्द्र सरकार नीट परीक्षार्थिणं दे हितें दी राखी करने लेई वचनबद्ध ऐ। उनें सब्बने विद्यार्थिणं गी भरोसा दोआया जे उंदे हर इक मसले दा हल पूरी पारदर्शता कन्ने बिजन कुसा गी नुक्सान पजाए दे कीता जाग। अज्ज इक सोशल मीडिया पोस्ट च प्रधान होरें गलाया जे केन्द्र सरकार सुप्रीम कोर्ट दे आदेश मूजब विद्यार्थिणं दे हितें च लोड़चदी गैह पुट्टोग। उनें गलाया जे नीट दी काउंसलिंग प्रक्रिया तौले गै शुरू होई जाग ते एह जरूरी ऐ जे इस दिशा च कुसा शक्क-शूबे बिजन अगगे बघाया जा। शिक्षा मंत्री होरें एह गल्ल छात्रें आस्सेआ नीट मतेयान विवाद दी जांच दी मंग गी दिक्खदे होई आक्खी।



Jual Oram Tribal Affairs

कैबिनेट मंत्री जुएल ओराम होरें नमीं दिल्ली च जनजातीय मामले दे मामलें दे मंत्रालय दा कम्मकाज सांभी लैता ऐ। मगरा उनें इक प्रेस कांफ्रेंस च आखेआ जे त्रीह बारी मंत्रालय दा कम्मकाज सांभना सम्मान आली गल्ल ऐ। आदिवासिं दी बुनियादी जरूरतें गी लेइयै उनें आखेआ जे मंत्रालय दी पैहली प्राथमिकता आदिवासी क्षेत्रें च शिक्षा दे नेटवर्क गी मजबूत करना ते सेहत क्षेत्र गी बढ़ावा देना ऐ।



Kejariwal

दिल्ली दी अदालतै कथित शराब घोटाले कन्नै जुड़े दे कालै धनै गी जायज बनाने आले मामले च मुख्मन्त्री अरविंद केजरीवाल गी जमानत देने सरबंधी मामलें दी सुनवाई 19 जून गी तैह कीती ऐ। ईडी आस्सेआ मामले च परता दाखल कराने लेई बाद्दू समां मंगे जाने बाद अतिरिक्त सेशन जज मुकेश कुमार होरें मामले गी अगड़ा पाई दित्ता।



Drugs

राश्ट्री राजधानी दिल्ली च इक विशेष टीम नै नशीले पदार्थें दे अंतराश्ट्री गिरोह दा भंडाफोड़ करदे होई 20 करोड़ रुपे दे गैर कनूनी नशीले पदार्थ जब्त करी लैते। विशेष सैल च इस गिरोह दे दऊं मुख्मिंबरें गी गिरफ्तार करी लैता, जेहड़े नाइजीरिया ते आईवरी पोस्ट थमां हे। दौनें जनें दिल्ली एनसीआर च रेइयै पूरे मुख्खै च नशीले पदार्थें दी सप्लाई करा'रदे हे। पुलस नै इंदे थमां 6 किलो ड्रगस बरामद कीती। पुच्छ-गिच्छ च पता लग्गा ऐ जे एह दौनें जनें पिछले दऊं

ब'रे थमां इस गैर कनूनी कम्मं च मुलव्वस हे। पुच्छ-गिच्छ दरान एह बी पता लग्गा ऐ जे दौनें जनें बिना वैद्य दस्तावेजे दे भारत च रवा करदे हे। इस गिरोह दे होरने मिंबरे दी पंछान करने ते उनेंगी गिरफ्तार करने दी कोशश कीती जा'रदी ऐ।

<><><><><><>

Kuwait Fire Incident

कुवैत च अग्ग लगने दी घटना च मारे गेदे 45 भारतीय नागरिकें दा पार्थिव शरीर लेइयै वायुसेना दा विशेष जहाज अज्ज बडलै कोची अंतर्राष्ट्रीय हवाई अड्डे पर पुज्जेआ। कोचीन अंतर्राष्ट्रीय हवाई अड्डे उप्पर 31 शव उतारे गे। जंदे बुधवार कुवैत दे मंगफ इलाके च श्रमिक दे रौहने आले इक आवास सुविधा च अग्ग लगने दी घटना घटी ही। भारतीय सरकार नै कल विदेश मामले दे राज्य मंत्री कीर्ती वर्धन सिंह होरें गी कुवैत रवाना कीता हा तां जे ओह कुवैत सरकार कन्नै राबता कायम करी तौले थमां तौले घटना च मारे गेदे भारतीय नागरिकें दे शवें गी भारत पजाई सकन ते घायलें दी हालत दा बी पता लाई सकन। अज्ज बडलै मृतकें दे शवें दे केरल पुज्जने मगरा विदेश मामले दे राज्य मंत्री होरें कुवैती प्रशासन दा इस पूरी प्रक्रिया च सैहयोग देने लेई आभार जताया।

<><><><><><>

India

दौ दिनी भारत-आईओआरए क्रयूज सैलसफा शिखर सम्मेलन अज्ज नमीं दिल्ली च सम्पन्नहोई गई। इंडिया ओशन एसोसिएशन आईओआरए थमां ऐहलकारें ते माहिरें, मिंबर मुख्खें बंगलादेश, केन्या, मालद्वीन, श्रीलंका, दक्खन अफ्रीका, ते तनजानिया थमां अधिकारिएं इस शिखर सम्मेलन च हिस्सा लैता। विदेश मंत्रालय नै आखेआ जे इस सम्मेलन थमां आईओआरए शिखर सम्मेलन गी क्रयूज सैलसफा दे क्षेत्र गी होर तगड़ा करने लेई सार्वजनिक खित्तें गी सांझा करने लेई मंच

फरहाम करदा ऐ। इसदे च मूलढांचा विरासत, नियामक मुद्दे, सतत् सैलसफा, रोजगार दे मौके पैदा करने ते कारोबार दे मौके बनाने जनेह मुद्दे पर बी चर्चा कीती गई।

<><><><><><>

WPI May Data

थोक मेंहगाई दर मई च बधी ऐ ते एह 15 म्हीने च सब्बने थमां मती उंचाई पर पुज्जी ऐ। मंत्रालय आस्सेआ जारी आंकड़े मूजब बरोबर करी खाने पीने आली चीजें, उत्पादे, कच्चे तेल, कुदरती गैस ते उत्पादन सरबंधी सेक्टरें च होए दे बदलाव होई सकदा ऐ।

<><><><><><>

IMD-Heat Wave

देश दे उत्तरी भारत च गर्मी दे प्रकोप थमां कोई राहत नेई। मौसम विभाग नै अज्ज उत्तर भारत दे किश हिस्सें सनें झारखंड, बिहार ते उत्तर प्रदेश च रैड अलर्ट दी चेतावनी दित्ती ऐ। आकाशवाणी कन्नै गल्ल करदे होई मुत्तलका विभाग दे विज्ञानिक डॉ. सोमा सेन होरें गलाया जे अज्ज झारखंड, बिहार ते उत्तर प्रदेश च रैड अलर्ट कन्नै गर्म हवाएं दा प्रकोप जारी रौहग। उआं बिहार ते झारखंड च कल्लै थमां गर्मी दे कैहर थमां थहोड़ी जनेई राहत मिलोग। पर उत्तर प्रदेश च अगलै 5 दिनें तगर लोक जबरदस्त गर्मी दा सामना करगंन की जे उत्थें रैड अलर्ट दी चेतावनी दित्ती गई ऐ। इआं गै पंजाब ते हरियाणा च बी गर्मी दे प्रकोप दा ऑरेंज अलर्ट जारी कीता गेआ ऐ। उआं मौसम विभाग नै इस म्हीने दी 19 तरीक तगर उप-हिमालयी पच्छिम बंगाल, असम ते पूर्वोत्तर भारत दे इलाकें च भारी बरखा दी पेशगोई कीती ऐ।

<><><><><><>

Weather-JK

मौसम विभाग नै जम्मू दे मैदानी इलाकें च गर्म हवा चलने ते जम्मू कश्मीर च अगले 5एं दिनें तगर मौसम गर्म ते खुश्क गै बने रौहने दी पेशगोई कीती ऐ। उआं विभाग दा गलाना ऐ जे 19 ते 20 जून गी गरज चमक कन्नै बरखा होई सकदी ऐ। 15 ते 18 बश्कार आम तौर पर मौसम खुश्क रौहग, पर उआं किश टामी-टामी थाहरें पर हल्की बरखा ते गरज चमक थमां इंकार नेई कीता जाई सकदा।



Kheer Bhawani Mela Kashmir

गांदरबल जिले दी तुलमुला थाहर अज्ज जेष्ठ अष्टमी दे मौके पर क्षीर भवानी मेला लग्गा जेहदे च खरी मती गिनतरी च कश्मीरी पंडित समुदाय दे लोकें हिस्सा लैता। इस दरान होरने समुदाय दे लोकें बी एहदे च शिरकत कीती। एह थाहर श्रीनगर शैहर थमां 27 किलोमीटर दी दूरी उप्पर ऐ। जम्मू थमां तकरीबन 5 ज्हार कश्मीरी पंडित गांदरबल पुज्जे। उंदे लेई सख्त सुरक्षा बंदोबस्त कीते गेदे हे। गांदरबल जिले च लोकें माता रागनया देवी मंदर च मत्था टेकेआ ते पूजा अर्चना कीती। लोकें जम्मू कश्मीर दी शांति ते खुशहाली लेई प्रार्थना बी कीती। कश्मीरी पंडित समुदाय दे लोकें दे मंदर पुज्जने दे मौके उंदा सुआगत बक्ख-बक्ख समुदाय दे लोकें आस्सेआ कीता गेआ।



LG-Kheer Bhawani

उपराज्यपाल मनोज सिन्हा होरें अज्ज गांदरबल जिले दे माता क्षीर भवानी मंदरै च मत्था टेकेआ। पत्रकारें कन्नै गल्ल करदे होई उपराज्यपाल होरें गलाया जे इस बारी 30 ज्हार शा मते श्रद्धालुएं माता दे मंदरै च दर्शन कीते। जम्मू थमां 200 बसें च श्रद्धालु क्षीर भवानी मंदरै लेई पुज्जे। उपराज्यपाल होरें गलाया जे

प्रशासन ट्रस्ट ते मकामी लोकें मंदरै च मत्था टेकन आए द श्रद्धालुएं गी हर सुविधा देने दे लोड़चदे जतन कीते न। उनें गलाया जे पिछले ब'रे जदूं ओह इस मंदरै च आए हे ते किश यात्रुएं यात्री निवास दी मंग कीती ही ते मुत्तलका अधिकारिएं कन्नै गल्ल करियै अगले 8 म्हीने च 1 ज्हार यात्रुएं दे ठैहरने लेई यात्री निवास तैआर करी दित्ता जाग। मुख सचिव अटल डुल्लू होरें बी माता क्षीर भवानी दे दर्शन कीते ते मंदरै च मत्था टेकेआ।

<><><><><><>